



*Sabtu, 28 Mei 2022*

**Ogen: Hakim-hakim 11: 29-35**



**Metenget Melasken Padan**



**P**adan entahpe Nazar labo terjeng persetujuan tapi perpadanen badia. Beda nge adi ikataken, " kari kusinggahi kam jam 12 ya moria, man kita i warung bakso" ras sepasang penganten erpadan i bas pemasu-masun. Kai bedana? Adi kalak si erpadan ninggahi temanna guna man bakso labo reh, maka banci sikataken ia salah. Tapi kalak si enggo ipasu-pasu Tuhan i bas perjabun guna erpadan saling setia sada ras sidebanna tapi kinatana la setia, maka enda labo terjeng salah tapi dosa.

Padan/nazar eme pengendesen diri man Tuhan guna ipersembahkan man pelayanen badia. Kalak si enggo erpadan, iharusken erpantang nandangi erbage-bage hal janah iatur i bas hukum. Biasana ilakoken i bas waktu si labo ndekah (biasana 30 wari). Kalak si erpadan, maka arus isehkenna kai si ipadankenna e sabap adi la isehkenna maka ia nggo erdosa (Ul. 23: 21-23). Jepta eme sekalak hakim nandangi Israel enem tahun dekahna. I bas atena menang ngelawan suku Amon, ia ernazar man Tuhan maka adi menang ia ngelawan Amon e, maka ipersembahkenna man Tuhan ise si pertama reh i bas ngalo-ngalo ia pagi tupung mulih ku rumahna. Tapi Jepta la metenget i bas padan siibelaskenna e. Maka teridah ia erkadiola erkiteken anakna sidiberu me singalo-ngalo ia. Amin bage gia, padan si enggo ibelasken arus ilakokenna.

Nazar/padan labo terjeng kata-kata biasa tapi tanggung jawabta si arus ilakoken. Umpamana, tupung lit anakta iperidiken, maka orangtuana si erpadan arus mpebelin-belin, ngajari ras mabai ia ku sekolah Minggu, anakta ingawanken, maka ia nggo erpadan guna jadi ngawan gereja si ertanggung jawab, janah adi anakta bengket ku bas pemasu-masun perjabun maka ije pe ia erpadan guna saling setia. Si e kerina wajib hukumna guna ilakoken. Sebab perpadanen si ibelasken e labo man pandita tapi man Tuhan Dibata. Bagepe i bas gerejanta megati ilakoken pengumpulan dana via janji iman. Sehkenlah perpadanenndu e, sabap lalap nge ituntut Tuhan padanndu e.